

四庫全書

子部

欽定四庫全書

子部

冊府元龜卷六百八十五至

詳校官中書臣朱文翰

侍讀臣孫球覆勣

總校官庶吉士臣何思鈞

校對官中書臣朱烜

謄錄監生臣曹元慶

欽定四庫全書

冊府元龜卷六百五

宋 王欽若等 撰

學校部

注釋第一

夫六藝之文所以明天道正人倫學者之所宗百王之
取則者也仲尼既沒微言遂絕而聖門達者傳受彌廣
歷聘諸國奮為人師亦復敷繹真義為之訓傳秦并天
下乃有坑焚之酷編簡散逸大義益乖自漢之表章六

經尊立學校方領矩步之士亦稍稍而出故其演暢經旨發明典故廣章句之學極討論之致師資或異傳受不同各自名家咸用垂世至乃述其訓詁以發揮隱賸推厥義例以錯綜條貫著撰之美藹乎前聞逮乎百家之衆制歷代之載籍為之注釋以輔其說者并紀焉
卜商魏人為魏文侯師傳周易二卷

漢孔鮒為陳勝博士撰論語義疏三卷

周王孫雒陽人作易傳二篇

史不載官下倣此

服光齊人

一云服生

著易傳

彭宣字子佩淮陽人為大司馬長平侯作易傳

戴崇字子平沛人為少府作易傳

魯申公為詩訓故而齊轅固燕韓生皆為之傳或取春

秋采雜說咸非其本義與不得已魯最為近之

與不得已者言

不得也三家皆不得其真而魯最近也

三家皆列於學官徵為大中大夫

韓嬰燕人也孝文時為博士景帝時至常山太傅嬰推

詩人之意而作內外傳數萬言其語頗與齊魯間殊然歸

一也淮南賁生受之燕趙間言詩者繇韓生韓生亦以易授人推易意而為之傳燕趙間好詩故其易微惟韓氏自傳之

賈誼為梁王太傅修春秋左氏傳誼為左氏傳訓故

丁寬為梁孝王將軍距吳楚號丁將軍作易說三萬言

訓詁舉大誼而已

誼謂經之旨趣也

今小章句是也

費直字長翁東萊人也治易為郎至單父令長於卦筮

亡章句徒以彖象繫辭十篇文言解說上下經

隋志載直注周

易四
卷

董仲舒為江都相少治春秋所著皆明經術之意及上
疏條教凡百二十三篇而說春秋事得失聞舉玉杯繁

露清明竹林之屬

皆其所著
書名也

復數十篇十餘萬言皆傳

於後世

隋志載仲舒撰
春秋決事十卷

夏侯勝為太子太傅受詔撰尚書論語說

解其意者
今意疏也

后倉通詩禮為博士至少府說禮數萬言號曰后氏曲

臺記

曲臺殿在
未央宮

孟喜字長卿為曲臺署長丞相掾為易章句十卷

張禹為成帝師以帝難數對已問經為論語章句獻之後至丞相安昌侯

劉向考易說以為諸易家說後至中壘校尉

歐陽高為博士作尚書章句

京房為魏郡太守撰周易章句十卷

一云十卷
二卷

周易錯八

卷

趙曄撰詩道微十一篇

孔安國為臨淮太守傳古文尚書十三卷今字尚書十
四卷傳古文孝經一卷

侯苞撰韓詩翼要十卷

嚴彭祖為太子太傅撰春秋左氏圖七卷又注春秋公
羊傳十二卷

尹更始為諫議大夫長樂戶將為穀梁章句十五卷
孔光注孝經一卷至太傅卒

樊光為中散大夫注爾雅三卷

侯苞注揚子法言

嚴遵字君平蜀郡人注老子二卷又注老子指歸一十卷

河上公注老子四篇又云作節解二卷

安丘望之為長陵三老為老子章句二卷

想余注老子二卷一云張魯或云劉表魯字公旗為鎮南將軍捷為郡文學卒史臣舍人注爾雅二卷

劉歆注爾雅三卷

與李巡注正同疑非歆注

後為京兆尹

後漢鄭衆為大司農傳毛詩及左氏條例章句又傳周
官禮記論語孝經

何休精研六經世儒無及者太傅陳蕃辟之蕃敗休廢

錮乃作春秋公羊解詁

博物志曰何休注公羊云何氏學有不解者或答曰休謙辭受

學於師乃宣此義不出於已此言為允也

覃思不闕門十有七年又注訓孝

經論語風角七分皆經緯典謨不與守文同說又以春

秋駁漢事六百餘條妙得公羊本意休善厯算與其師

博士羊弼追述李育意以難二傳作公羊墨守

言公羊之義不

可攻如墨翟之守城也

左氏膏肓穀梁廢疾後為諫議大夫

鄭玄隱修經業杜門不出時任城何休好公羊學遂著

公羊墨守左氏膏肓

說文曰膏膈也心下為膏喻左氏之疾不可為也

穀梁廢

疾玄乃發墨守鍼膏肓起廢疾休見而嘆曰康成入吾

室操吾矛而伐我乎玄作毛詩箋周官注玄本習小戴

禮後以故經校之取其義長者故為鄭氏學玄又注小

戴所傳禮記四十九篇通為三禮焉玄所注周易尚書

毛詩儀禮禮記論語孝經尚書大傳中候乾象歷又注

天文七政論語魯禮禘祫義六藝講論毛詩譜駁許慎
五經異議答臨孝存周禮凡百餘萬言玄質於辭訓通
人頗譏其繁至於經傳洽熟稱為純儒齊魯間宗之又
注論語孔子弟子目錄一卷又注孟子七卷又撰三禮
音各一卷詔以大司農徵不起

馬融字季長為南郡太守議郎作毛詩傳及為左氏三
家異同之說注孝經論語詩易三禮尚書列女傳老子
淮南子離騷

夏侯建字長卿勝從父兄子為博士議郎太子少傅師事勝及歐陽高左右采獲又從五經諸儒問與尚書相出入者牽引以次章句為小夏后氏學

賈逵字景伯左氏傳國語為之解詁五十一篇永平中上疏獻之明帝重其書寫藏祕館逵數為帝言古文尚書與經傳爾雅訓詁相應詔令撰歐陽大小夏侯尚書古文同異逵集為三卷帝善之復令撰齊魯韓詩與毛

詩異同並作周官解詁

逵又於章帝時受詔列公羊穀梁不如左氏四十事名曰左氏

長義帝
善之
為侍中卒

汪丹建武初為博士作易通論七篇世號汪君通
應劭為袁紹軍謀校尉集解漢書又注漢儀五卷

王逸順帝時為侍中著楚辭章句行於世

牟長少習歐陽尚書著尚書章句皆本之歐陽氏俗號
為牟氏章句為中散大夫卒

翟酺為將作大匠尤善圖緯著援神鉤命解詁十二篇
張衡為尚書著周官訓詁崔瑗以為不能有異於諸儒

也又欲繼孔子易說彖象象殘缺者竟不能就

衛宏從大司空杜林受古文尚書為作訓旨後為議郎
謝曼卿善毛詩乃為其訓平帝元始中公車徵說詩

橋仁為大鴻臚初從同郡戴德學著禮記章句四十九
篇號曰橋君學

穎容字子嚴陳國長平人也初平中避亂荆州聚徒千
餘人著春秋左氏條例五萬餘言劉表以為武陵太守
不起

謝該字文儀善明春秋左氏為世名儒門徒數百十人
建安中河東人樂詳條左氏疑滯數十事以問該皆為
通解之名為謝氏釋行於世為議郎卒

許慎以五經傳說臧否不同於是撰為五經異議又注
淮南子二十一卷再遷除涑長卒

揚終著春秋外傳十二篇改定章句十五萬言徵拜郎
中

景鸞字漢伯理齊詩施氏易兼授河雒圖緯作易說及

詩解文句及作月令章句州郡辟命不就

程曾字秀升受業長安習嚴氏春秋積十餘年還家講授會稽顧本等數百人嘗居門下著書百餘篇皆五經通難又作孟子章句為海西令卒

杜林為司空注蒼頡篇二卷

服虔字子慎少以清苦建志入太學受業有雅才善著文論作春秋左氏傳解行之又以左氏傳駁何休之所駁漢事六十條又撰左氏傳音一卷為九江太守免

張正習韓詩作章句

許淑字惠卿為大中大夫注解左氏

鄭興將門人從劉歆講正大義歆美興才使撰條例章句訓詁為大中大夫

孔嘉字山甫為大中大夫注解左氏

趙岐注孟子十四卷後為太常

王隆撰漢官解詁三卷建武中為新汲令

盧植作尚書章句三禮解詁官至尚書

荀單字景文作易集解為太子中庶子

包咸字子良為大鴻臚為論語章句

宋衷字仲子南陽章陵人為荊州五等從事注易九卷

周氏為論語章句

胡廣注漢官解詁三卷為太傅卒

荀爽著禮易傳詩傳尚書正經春秋條例又云注周易

十篇

又有荀爽九家集注十卷不知何人所集稱荀爽者以為主故也其序有荀爽京房馬融鄭玄宋衷

虞翻陸績姚信程子玄子不詳何人為義易注內又有張氏朱氏並不詳何人春秋公羊傳問

答八卷及辯讖并它所論敘題為新書為司空

陳元為司空南閣祭酒撰左氏同異

延篤字叔堅受左氏於賈逵之孫伯升因而注之為京兆尹後卒於家

蔡邕撰月令章句十二卷後為左中郎將

王玠為司徒掾撰春秋左氏逵長議一卷

劉熙為安南太守撰禮詒法三卷釋名八卷

宋均撰孝經皇義一卷注詩緯十八卷注禮記默房二

卷注樂緯二卷注孝經鉤命決六卷注孝經援神契七卷注論讖八卷後為河內太守

崔豹為尚書左丞集論語集義八卷

劉表為鎮南將軍荊州牧撰易章句五卷

一云注易十卷

高誘注呂氏春秋二十六卷淮南子二十一卷辟司空

掾除濮陽令

樊英著易章句世名樊氏學後為光祿大夫賜告歸

曹充傳慶氏禮建武中為博士永平中後拜侍中作章

句辯難於是遂有慶氏學

曹褒充之子也傳充慶氏禮作通義十二篇演經雜論
百二十篇後為侍中

魏王弼字輔嗣為尚書郎好論儒道辭才逸辯注易及
老子又作老子指畧及撰易畧一卷周易義一卷論語
釋疑三卷

王朗字景興為司徒著易春秋孝經周官傳及撰春秋
左氏釋駁一卷

王肅字子雍年十八從宋忠讀太玄而更為之解初肅
善賈馬之學而不好鄭氏采會同異為尚書詩論語三
禮左氏解及撰定父朗所作易傳皆列於學官及作周
易春秋例毛詩禮記春秋三傳國語爾雅諸注隋書志
載肅撰尚書駁議五卷又撰尚書義問三卷又解孝經
一卷論語釋駁三卷及解孔子家語又注老子二卷又
撰三禮音各一卷為太常

董遇字季直為侍中大司農注周易十卷又為春秋左

氏傳章句

周生烈字文逸燉煌人為博士注集解左傳又解論語
陳羣字長文為司空解論語

鍾會撰周易盡神論一卷又撰周易無互體論三卷及
注老子二卷後為鎮西將軍

何晏撰周易私記二十卷周易講疏十三卷注孝經一
卷注論語十卷五經大義五卷老子道德經二卷後為
尚書

劉楨為太子文學撰毛詩義問九卷

王基字伯輿東萊人為荊州刺史撰毛詩駁一卷

駁王肅中

鄭義又注解左氏傳

康信為樂平太守撰春秋要一卷

徐凱為安平太守撰答春秋公羊論二卷

魏益為大長秋撰春秋三傳論十卷

蘇林字孝友為散騎常侍注孝經一卷

劉劭字孔才為光祿大夫注孝經二卷

孟子注老子二卷或云孟康字公休為中書監注老子
二卷

孫炎以祕書監徵不起注儀禮二十九卷

一云注禮記三十卷

注

爾雅二卷音一卷

李仲欽梓潼人著左氏指歸

糜信字南山為樂平太守注穀梁十二卷

蜀杜瓊為太守字伯瑜少受學於任安注韓詩章句十
餘萬言不教諸子內學無傳業者

蔣琬為大將軍錄尚書事撰喪服要義一卷

李譔為中散大夫右中郎將著古文易尚書毛詩三禮
左氏傳太玄指歸皆依準賈馬異於鄭玄與王氏殊隔
初不見其所述而意歸多同

譙周字允南入晉為散騎常侍不拜封陽城亭侯注論
語十卷撰五經然否論五卷古文考二十五卷

蜀才不詳何人注周易十卷又注老子二卷

七志云是
王弼後人

蜀李書云姓范名長生一名賢隱居
青城山自號蜀才李雄以為丞相

尹濤注易六卷

巨生解老子二卷

吳虞翻字仲翔初為後漢侍御史與少府孔融書並示以所著易注融荅書曰聞延陵之理樂觀五子之治易乃知東南之美者非徒會稽之竹箭也又觀象雲物察網緼原其禍福與神合契可謂探賾窮通者也翻又為老子論語國語訓注又注揚子太玄經十四卷

范望州字淑文為尚書郎作老子注訓三卷

程秉為太常著周易摘尚書駁論語弼凡三萬餘言

徐整為太常卿為毛詩譜三卷又撰孝經嘿注一卷

韋昭為侍中撰毛詩荅雜問七卷又注春秋國語二十

二卷孝經解贊一卷辨釋名一卷漢書音義七卷

射慈字孝宗為中書侍郎撰喪服變除圖五卷禮記音

一卷

士燮字彥威為衛將軍注春秋經十一卷

唐固字世正為尚書僕射注春秋穀梁傳十三卷又著

春秋外傳國語二十一卷

劉毅為太尉撰尚書荅

姚信字德祐吳興人為太常卿注易十卷

謝貞撰禮記音一卷

陸績為鬱林太守述易十三卷

陸璣字元恪吳郡人為太子中庶子烏程令作毛詩草木鳥獸蟲魚疏二卷

晉羊祜為征南大將軍解釋老子二卷

杜預為征南大將軍鎮荊州既立功之後從容無事乃
耽思經籍為春秋左氏經傳集解又參考衆家譜第謂
之釋例又作盟會圖春秋長厯備成一家之學比老乃
成當時論者謂預文義質直世人未之重惟祕書監摯
虞賞之曰左丘明本為春秋作傳而左傳自以孤行釋
例本為傳設而所發明何但左傳故亦孤行

隋志載預
傳春秋左

氏傳二卷又
撰音一卷

嵇康為中散大夫撰春秋左氏音三卷

向秀字子奇河內懷人為散騎常侍清悟有遠識少為
山濤所知雅好老莊之學莊周著內外數十篇歷世才
士雖有觀者莫適論其旨統也秀為之隱解發明其趣
振起玄風讀之者超然心悟莫不自足一時也又為易
義

郭象字子玄為太傅主簿好老莊能清言先是注莊子
者數十家莫能究其旨統向秀於舊注外而為解義妙
演奇致大暢玄風惟秋水至樂二篇未竟而秀卒秀子

幼其義零落然頗有別本遷流象為人行薄以秀義不傳於世遂竊以為已注乃自注秋水至樂二篇又易馬蹄一篇其餘衆篇或點定文句而已其後秀義別本出故有向郭二莊其義一也

又注論語體畧二卷

劉實為太尉尤精三傳辨正公羊以為衛輒不應辭以王父命祭仲失為臣之節舉此二端以明臣子之體遂行於世撰春秋條例二十卷

王接為臨汾公相國學雖博通持精禮傳嘗謂左氏辭

義贍富自是一家書不主為經發公羊附經立傳經所
不書傳不妄起於文為儉通經為長任城何休訓釋甚詳
而黜周王魯大體乖破且志通公羊而往往還為公羊
病接乃更注公羊春秋多有新義

袁准字孝尼至給事中為易周官詩傳及論五經滯義
聖人之微言并注喪服經

袁喬為益州刺史湘西侯博學有文才注論語及詩皆
行於世

范甯以春秋穀梁氏未有善釋遂沉思積年為之集解其義精審為世所重既而徐邈復為之注世亦稱之又注古文尚書舜典一卷為豫章太守卒

鄭冲為散騎常侍與孫邕曹義荀顛何晏共集論語諸家訓注之善者記其姓名因從其義有不安者輒改易之名曰論語集解成奏之魏朝于今傳焉

干寶為散騎常侍領著作為春秋左氏義外傳注周易周官凡數十篇又撰周易問難二卷周易玄品二卷周

易文義一卷春秋左氏承傳義十五卷春秋序論三卷
又為詩音

鄧粲為荊州別駕注老子行於世

虞溥為鄱陽內史注春秋經傳序

束皙為尚書郎才學博通著五經通論發既行於世

劉黃老劭之族子太元中為尚書郎有義學注慎子老
子竝傳於世

魯勝字叔時代郡人也少有才操為佐著作郎其著述

為世所稱遭亂遺失惟注墨辯存其序曰名者所以別
同異明是非道義之門政化之準繩也孔子曰必也正
名名不正則事不成墨子著書作辯經以立名本惠施
公孫龍祖述其學以正刑名於世孟子非墨子其辯言
正辭則與墨同荀卿莊周等皆非毀名家而不能易其
論也必有形察莫如別色故有堅白之辯名必有分明
分明莫如有無故有無序之辯是有不是可有不可是
名兩可同而有異異而有同是之謂同異至同無不同

至異無不異是謂辯同異異同生是非是非生吉凶取
辨於一吻而原極天下之汙隆名之至也自鄧析至秦
時名家者世有篇籍率頗難知後學莫復傳習於今五
百餘歲遂亡絕滅墨辯有上下經經各有說凡四篇與
其書衆篇連第故獨存今引說在經各附其章疑者闕
之又采其衆雜集為刑名二篇畧解指歸以俟君子其
或興微繼絕者亦有樂乎此也

李克為大著作遷中書侍郎注尚書及周易旨六篇釋

莊論上下二篇注論語十卷

劉兆五辟公府三徵博士皆不就博學洽聞以春秋一經而三家殊途諸儒是非之議紛然互為讎敵乃思三家之異合而通之周禮有調人之官作春秋調人七萬餘言皆論其首尾使大義無乖時有不合者舉長短以通之又為春秋左氏解名曰全綜公羊穀梁解詁皆納經傳中朱書以別之又撰周易訓註以正動二體玄通其文凡所贊述百餘萬言

徐苗再徵博士不就作五經同異評

郭璞為著作郎注釋爾雅別為音義圖譜又注三蒼方言穆天子傳山海經及楚辭子虛上林賦數十萬言

汜毓奕世儒素召補太傅叅軍不就合三傳為之解注撰春秋釋疑肉刑論凡所述造七萬言

徐邈為驍騎將軍撰正五經音訓學者宗之所注穀梁傳見重於時又撰楚辭音一卷莊子音一卷

蔡謨字道明領祕書監總應劭已來注班固漢書者為

之集解又撰禮記音二卷

徐廣為祕書監撰答禮問及毛詩背隱藏義二卷

虞喜累徵博士不就釋毛詩畧注孝經撰周官駁難又注論語九卷新書討張論語十卷

郭琦字公偉有雅量博學注穀梁京氏易百卷鄉人王游等皆就琦學為佐著作郎

宋纖字令艾燉煌人為張祚太子太傅明究經緯注論語及為詩頌數萬言

孟整一云孟陋江夏人博學多通於三禮注論語行於世徵撫軍叅軍不就

虞諶為司空從事中郎將注莊子行於世

盈氏注論語十卷又注老子二卷

薛貞為太尉叅軍注歸藏十三卷

黃穎為廣州儒林從事注周易十卷

王廣為驃騎將軍注周易三卷

張軌字士彥為涼州刺史謚武公撰易義

宣舒字幼驥為宣城令為易通知來藏往論

邢融裴藻許適楊藻四人不詳何人竝為易義

袁悅之字元禮為驃騎諮議叅軍注繫辭及為易音

孫綽字興公為廷尉卿集註論語十卷

張瑀為著作郎注周易八卷 一云集解易十二卷

桓玄字敬道為後將軍荊州刺史注周易繫辭二卷

謝萬字萬石為西中郎將注周易繫辭一卷又注孝經

韓伯字康伯為中郎太常注周易繫辭二卷

李軌為祠部中郎都亭侯撰周易音一卷春秋左氏傳音三卷又撰春秋公羊音一卷又解小雅一卷注揚子法言莊子音一卷周禮儀禮音各一卷禮記音一卷

楊又字玄舒為司徒左長史撰周易卦序論一卷又撰毛詩辨異三卷毛詩異義二卷毛詩雜義五卷

阮咸字仲容為散騎常侍撰易義

阮渾字長咸為中庶子撰易義

一云撰周易論二卷

顧夷為揚州從事撰難王輔嗣義一卷

李顥字長林為江夏太守撰周易卦象數旨二卷集解尚書十一卷尚書新釋二卷

謝沉字行思為祠部郎中註尚書十五卷又註毛詩二十卷釋義十卷

孔晁為五經博士撰尚書義問三卷又注春秋外傳國語

江熙字太和為兗州別駕注毛詩二十卷又注論語十卷

孫毓字休朗為長沙太守撰毛詩異同評十卷評毛
鄭王肅三家異同而朋於王又為春秋左氏傳義註二
十八卷禮記音一卷

陳統為徐州從事撰難孫毓申鄭毛詩評四卷又傳毛
詩索隱二卷

殷仲堪為荊州刺史撰毛詩雜議四卷

孟氏註莊子十八卷

王楙約為燕王師註周官寧朔新書八卷禮記寧朔新

書八卷

陳歆為司空長史撰周官禮異同評十三卷

吳商為益壽令撰禮難十二卷

孔倫為廬陵太守撰集註喪服經傳一卷

張嗣注老子二卷

王愆期字門子為散騎常侍注春秋公羊經十三卷

江惇字思悛累徵不就撰毛詩音又傳公羊音一卷

庾翼為安西將軍荊州刺史撰答春秋公羊釋論語一

卷

徐乾字文祚為給事中注春秋穀梁傳十三卷

張靖為業邑太守注春秋穀梁傳十卷又箋穀梁廢疾
荀勗為尚書令集解孝經一卷

袁敬仲為東陽太守集議孝經一卷

陽宏為給事中注孝經一卷

虞盤佐字弘猷高平人注孝經一卷

史云處士

孫氏注孝經一卷

殷仲文為東陽太守注孝經一卷

殷叔道為晉陽太守注孝經一卷

車武子為丹陽令注孝經一卷

崔豹字正熊為尚書左兵中郎注論語十卷

江鴻為兗州別駕集解論語

梁凱為國子博士注論語十卷

繆播為太弟中庶子撰論語旨序三卷

樂肇為尚書郎撰易義及論語釋疑十卷又撰論語駁

序二卷

庾亮為征西將軍開府儀同三司撰論語君子無所爭

一卷

陽方為高涼太守撰五經鈎沉十卷

戴逵字安道為散騎常侍撰五經大義三卷又撰老子

音一卷

劉寶為安北將軍撰漢書駁義二卷

摯虞為太常卿註三輔決錄七卷

王尚述字君曾為江州刺史註老子二卷

程韶為郎中集解老子二卷

邯鄲氏註老子二卷

袁真字彥仁為西中郎將註老子二卷

常氏注老子二卷

孫登字仲山為尚書郎注老子道德經

張湛為中書侍郎注列子八卷

崔謨為議郎注莊子十卷

司馬彪字紹統為祕書監注莊子二十一卷

李頤字景真為丞相叅軍自號玄道子注莊子三十卷
皇甫謐累徵不起注鬼谷子三卷

王廙字世將為荊州刺史注易十二卷

庾運字玄度為尚書撰易義

一云易注

應貞字吉甫為散騎常侍為明易論

荀憚字景文為太子中庶子撰易義又云注易十卷

張輝字義元為侍中撰易義

王宏字正宗弼之兄為大司農撰易義

袁宏字彥伯為東陽太守注孝經

王濟字武子為河南尹撰易義

衛瓘字伯玉為太保撰易義又注論語八卷

張馮字長明為司徒左長史註論語十卷又註老子三卷

杜育字方叔為國子祭酒撰易義

楊瓚為司徒左長史撰易義

阮侃字德恕為河內太守撰詩音

蔡氏孔氏不詳何所人竝為詩音

陳銓註周禮喪服

曹耽字愛道辟安北諮議叅軍不就撰禮記音二卷

尹毅為國子助教撰禮記音一卷注論語十卷

范宣字宣子徵員外不起以講誦為業禮易論難皆行
於世又撰禮記音一卷

聶氏作周禮音一卷

一云定鄭氏音出北王
工南無此書不詳何人

孔衍字舒元為廣陵相撰春秋穀梁傳集解十四卷註
公羊十四卷

荀勗字世言為尚書左侍郎撰左氏音四卷集解穀梁
十卷

高龍為河南太守注公羊十二卷

段肅注穀梁十二卷

徐整注孝經

劉遺民為柴桑令撰老子玄機一卷

楊泓為給事中註孝經

庾氏注孝經

董景道字文博弘農人劉曜累徵不起明三禮禮義顯
遵鄭氏著通論非駁雜諸儒演廣鄭音

冊府元龜卷六百五

欽定四庫全書

冊府元龜卷六百六

宋 王欽若等 撰

學校部

注釋第二

宋何偃為侍中素好談玄注莊子逍遙篇又撰毛詩釋一卷

卞伯玉為東陽太守注周易繫辭二卷

荀柔之潁陽人為奉朝請注周易繫辭二卷并為易音

范歆為陳令撰周易義二卷

何諲之為中大夫撰周易疑通五卷

沈林撰周易義三卷

姜道盛為給事中注集釋尚書十一卷

一云注古文尚書

樂安王友撰伊訓說

孫暢之撰毛詩引辯一卷毛詩序義七卷五經雜義六卷

雷次宗字仲倫以通直郎徵不起撰毛詩序義二卷畧

注喪服經傳一卷

裴松之為大中大大夫撰集注喪服經傳一卷注三國志六十五卷

蔡超宗字希遠為丞相諮議叅軍集注喪服經傳二卷庾蔚之字季隨為員外常侍註喪服要記及略解儀禮十卷

徐爰字季玉為大中大夫註周易繫辭二卷為易音毛詩音禮記音二卷三國志評三卷

雷肅之撰禮記義疏三卷

何始貞撰春秋左氏區別三十卷

費沈為撫軍司馬撰喪服集議十卷注孝經一卷

何承天為廷尉卿撰禮論三百卷注孝經一卷

任預撰禮論條牒十卷答問雜儀二卷

張略為司空撰論語疏八卷

裴駟注史記八十卷

徐野民為中散大夫撰史記音義十二卷

諸葛氏撰楚辭音一卷

周續之字道祖為詩序義

劉道拔為海豐令注喪服經傳一卷

葉遵字長儒為奉朝請注儀禮十二卷

荀昶字茂祖為中書郎注孝經

孔澄之字仲淵為新安太守注論語一卷

李叔之字穆夜撰莊子義疏三卷

南齊沈麟士隱居教授著周易兩繫莊子內篇訓注易

經禮記春秋尚書論語孝經喪服老子要略數十卷

司馬攡撰喪服經傳義疏五卷

虞愿為廷尉著五經論問

顧歡字景怡或云字玄平為太學博士注王弼易二繫
又撰毛詩集解序義又作老子堂話四卷一云老子義
疏

徐伯珍東陽人積學十年究尋經史吳郡顧歡摘出尚
書滯義伯珍訓答甚有條理儒者宗之後刺史豫章王

辟從事不就

祖沖之為長水校尉著易老莊義釋論語孝經注九章造綴述數十篇

費元珪注周易九卷

劉瓛字子珪為步兵校尉撰周易乾坤義一卷又撰周易四德例一卷毛詩序義疏一卷毛詩次篇義一卷周易繫辭義疏二卷

顧瑄撰尚書問一卷

明僧紹字承烈平原人國子博士徵不赴注繫辭為易義及集解又注孝經一卷

樓幼瑜撰喪服經傳義疏二卷

王玄載字彥運為光祿大夫注孝經一卷注老子道德經二卷

虞遐為負外郎注孝經

陸澄為光祿大夫撰漢書注一卷

姚方興采馬王之注造尚書孔傳舜典一篇

田携之字僧紹為宋平太守注周禮喪服二卷

關康之世居京口以文義見稱徵通直郎不就顧悅之
難王弼易義四十餘條康之申王難顧遠有情理又為
毛詩義經籍疑滯多所論釋及造禮論十卷

梁賀瑒為步兵校尉領五經博士著禮易老莊講疏
朝廷博議數百篇賓禮儀注一百四十五卷孝經義
疏一卷五經異同論一卷

伏曼容為臨海太守為周易毛詩喪服集解老莊論語

義

江避為南平王大司馬府記室避博學有思理更著論語孝經

韋稜為治書御史著漢書續訓三卷

崔靈恩為國子博士先習左傳服解不為江東所行及改說杜義每文句常申服以難杜遂注左氏條義以明之時有助教虞僧誕又精杜學因作申杜難服以荅靈恩世竝行焉靈恩集注毛詩二十二卷集注周禮四十

卷三禮義宗四十七卷左氏經傳義二十二卷左氏條例十卷公羊穀梁文句義十卷

劉昭為豫章王中軍臨川記室初昭伯父彤集衆家晉書注于寶晉紀為四十卷至昭又集後漢同異以注范曄書世稱博悉遷通直郎出為剡令卒官集注後漢一百八十卷

庾詵徵黃門侍郎不赴著易林二十卷又著喪服儀文字體例老莊義疏注算經及七曜曆

何肩為左氏尚書注周易十卷毛詩總集六卷毛詩隱義十卷禮記隱義二十卷禮答問五十五卷

史不載官

范述曾為太中大夫注易文言

沈重字德厚為五經博士多所撰述咸得其指要行於世者周禮義三十一卷儀禮義二十五卷禮義三十卷毛詩義二十八卷喪服經義五卷周禮音一卷儀禮音一卷禮記音一卷毛詩音二卷

孔子祛為步兵校尉著尚書義二十卷集注尚書三十

卷續朱异集注周易一百卷續何承天集禮論一百五

十卷

一云撰
禮易詩

皇侃為國子助教撰禮記講疏五十卷及喪服義疏又
撰論語義十卷孝經疏三卷

劉杳為尚書左丞撰楚詞草木疏一卷

陶弘景為奉朝請著孝經論語集注本草集注及注毛
詩序一卷三禮目錄一卷注孝經一卷集解論語十卷
宋蹇為大中大夫注周易繫辭二卷

李王之為臨沂令撰周易乾坤義一卷

南平王撰周易幾義一卷

褚仲都為五經博士撰周易講疏十六卷

蕭子政為都官尚書撰周易義疏十四卷繫辭義疏三卷

薛景和撰周易普玄圖八卷

顏氏撰周易大演統一卷

劉叔嗣為五經博士注尚書七篇序

又云注尚書二十一卷

費彪為國子助教撰尚書義疏十卷

謝曇濟撰毛詩檢漏義二卷

何佟之撰喪服經傳義疏一卷禮答問十卷

裴子野為中書侍郎撰喪服傳一卷

沈宏撰春秋五辯二卷

周捨為太子詹事撰禮疑義五十二卷

嚴植之為中撫軍記室叅軍兼五經博士注孝經一卷

蕭子顯為吳興太守撰孝經義疏一卷又撰孝經愛敬

義一卷

叔明為揚州從事文學太史撰孝經義一卷又集解論

語

劉被為太尉叅軍撰論語孔志十卷

述孔
義疏

蕭子範為國子祭酒注千字文一卷

鄒誕生為輕車錄事叅軍撰史記音義三卷

韋稜為北平諮議叅軍撰漢書續訓二卷

杜弼注老子

沈琰約之子也為黃門侍郎集注莊子又注爾雅十卷
賀琛為中軍宣成王長史撰三禮講疏五經滯義

許懋撰風雅比興義十五卷

周興嗣為給事中直西省左衛率周捨奉勅注高祖所
製歷代賦啟興嗣助焉

後梁蔡大寶為中書監博覽羣書學無不綜著尚書義
疏三十卷

陳周弘正為尚書左僕射領國子祭酒所著周易義疏

十六卷論語疏十一卷莊子疏八卷老子疏五卷孝經疏二卷行於世

王元規為尚書祠部郎入請為秦王東閣祭酒著春秋發題辭及義記十一卷續經典大義十四卷孝經義記二卷左傳音三卷禮記音二卷

張譏為國子博士所撰周易義三十卷尚書義十五卷毛詩義二十卷孝經義八卷論語義二十卷老子義十一卷莊子內篇義十二卷外篇義二十卷雜篇義十卷

玄部通義十二卷

姚察為吏部尚書入隋為太子內舍人著漢書訓纂三十卷漢書集解一卷定漢書疑二卷

謝嶠撰喪服義七卷并爾雅音

沈文阿為通直散騎常侍撰春秋左氏經傳義畧三十

卷

一云撰經典大義十八卷

徐孝克為散騎常侍入隋為國子博士撰孝經講疏六

卷論語句義五卷

臧競撰范漢音訓三卷

施乾為博士撰爾雅音

顧野王為舍人撰爾雅音

戚袞為太學博士撰禮記義四十卷

後魏房景先孝文時為太學博士作五經疑問百餘篇
又符璽郎王神貴答之名為辯疑合成十卷亦有可觀
辛子馥為尚書右丞以三傳經同說異遂總為一部傳
注並出較比短長會亡未就

高允為太常所製左氏公羊釋毛詩拾遺論雜解議何鄭膏肓事凡百餘篇

宋繪少勤學多所博覽好撰述依准裴松之注三國志體注王隱及中興書

闕駟博道經傳注王朗易傳學者藉以通經累官至姑臧太守

張湛燉煌人好學能屬文仕沮渠蒙遜為黃門侍郎梁州平入國司徒崔浩識禮之浩注易叙曰國家西平河

右燉煌張湛金城宗欽武威段承根三人皆儒者竝有雋才見稱於西州每與余論易餘以左氏傳卦解之遂相勸為注故因退朝之餘暇而為之解焉其見稱如此劉昞注周易韓子人物志黃石公三略竝行於世後為樂平王從事中郎

劉芳為太常撰鄭玄所注周官儀禮音干寶所注周官音王肅所注尚書音何休所注公羊音范甯所注穀梁音韋昭所注國語音范曄注後漢書音各一卷辯類三

卷徐州人地錄二十卷急就篇續注音義證三卷毛詩箋音義證十卷禮記義證十卷周官儀禮義證各五卷陳竒博通墳籍常非馬融鄭玄解經失旨志在著述五經始注孝經論語頗傳於世為縉紳所稱召赴京不得敘其論語注義多異鄭玄往往與司徒崔浩同

常爽字仕明河內人置學館於溫水之右門徒七百餘人爽因教授之暇述六經略注以廣制作甚有條貫其序曰傳稱立天之道曰陰與陽立地之道曰柔與剛立

人之道曰仁與義然則仁義者人之性也經典者身之
文也皆以陶鑄神情啟悟耳目未有不繇學而能成其器
不繇習而能利其業是故季路勇士也服道以成忠烈
之槩甯越庸夫也講藝以全高尚之節盖所繇者習也
所因者本也本立而道生身文而德備焉昔者先王之
訓天下也莫不導以詩書教以禮樂移其風俗和其人
民故恭儉莊敬而不煩者教深於禮也廣博易良而不
奢者教深於樂也溫柔敦厚而不愚者教深於詩也疏

通知遠而不誣者教深於書也潔靜精微而不賊者教深於易也屬辭比事而不亂者教深於春秋也夫樂以和神詩以正言禮以明體書以廣聽春秋以斷事五者蓋五常之道相須而備而易為之源故曰易不可見則乾坤其幾乎息矣繇是言之六經者先王之遺烈聖人之盛事也安可不遊心寓目習性文身哉頃因暇日屬意藝林略撰所聞討論其本名曰六經畧注以訓門徒馬其畧注行於世爽不仕號儒林先生

劉獻之博陵人徵典內校書以疾辭門徒數百皆通經之士時五經大義雖有師說而海內諸生多有疑滯咸決於獻之六藝之文雖不悉注然所撰宗旨頗異舊義撰三禮大義四卷三傳略例三卷注毛詩序義一卷今行於世并章句疏三卷

李彪在祕書歲餘區分書體述春秋三傳十卷

酈道元為御史中尉好學歷覽奇書撰注水經四十卷
本志十三篇

崔浩為司徒注周易十卷注急就章二卷

元明進撰毛詩義府三卷

游肇為國子博士為易解

徐遵明華陰人東道大使元羅表薦之竟無禮辟遵明撰春秋義章為三十卷

北齊杜弼為膠州刺史耽好玄理老而愈篤又注莊子惠施篇易上下繫名新注義苑並行於世

李鉉為國子博士撰定孝經論語毛詩三禮義疏及三

傳異同易義例合三十餘卷

權會為四門博士注易一部行於世

後周樂遜為大學博士所撰孝經論語毛詩左傳春秋序論十餘篇又著春秋序義通賈服說發杜氏違辭理並有可觀

樊深為國子博士撰孝經喪服問疑各一卷又撰七經異同說三卷義網略論并目錄三十卷並行於世

熊安生為露門學博士下大夫所撰周禮義疏二十卷

禮記義疏四十卷孝經義疏一卷竝行於世

蕭大圜為滕王友入隋為西河郡守撰喪服儀注五卷
要訣二卷

隋宇文弼為尚書孝經注行於世

明克讓為太子率更令著孝經義疏一部

王頴撰五經大義三十卷

蕭該為國子博士撰漢書及文選音咸為當時所貴

張冲字叔玄初仕陳為左中郎將非其好也乃覃思經

典撰春秋義畧異於杜氏七十餘事喪服義三卷孝經義三卷論語義十卷前漢書義十二卷官至漢王侍讀
辛彥之為路州刺史撰五經異義一部

王孝藉開皇中召入祕書注尚書及詩遭亂零落

辛德源為著作郎王邵同修國史德源每於務隙撰集
注春秋三十卷注揚子法言二十卷

劉炫為太學博士以品卑去任著論語述議十卷春秋
攻昧十卷五經正名十二卷孝經述議五卷春秋述議

三十卷尚書述議二十卷毛詩述議四十卷又注詩譜
二卷及注春秋左氏傳杜預序集解一卷

褚輝為太學博士撰禮疏一百卷

顧彪為祕書學士明尚書春秋為古文尚書疏二十卷
今文尚書音一卷大傳音一卷尚書文義一卷

何妥為國子祭酒通直散騎常侍撰周易講疏十三卷孝
經義疏三卷莊子義疏四卷

唐魏徵為侍中徵以戴聖禮記論次不倫遂為類禮二

十卷以類相從削其重複採先儒訓注擇善從之研精覃思數年而畢太宗覽而善之賜物一千段錄數本以賜太子及諸王仍藏之祕府

徐文遠為國子博士撰左傳義疏六十卷行於時

陸德明為國子博士撰老子疏十卷莊易疏各一十五卷經典通釋三十卷竝行於時

王玄度為校書郎貞觀十六年十月上其所注尚書毛詩周易并義決三卷與舊解尤別者一百九十餘條付

學官詳其可否諸儒皆因習先師譏其穿鑿玄度隨方
應荅竟不肯屈太宗欲廣見聞竝納之祕府

王方慶為麟臺監精三禮好事者多詢訪之每所酬荅
咸有典據故時人編次名曰雜禮荅問

孔穎達為國子祭酒太宗以儒學多門章句繁雜令穎
達與諸儒撰正五經義疏一百七十卷數年乃成名曰
義贊有詔改為五經正義云雖復包括衆家稍為詳悉
然亦有紕繆

崔義玄少受章句之學五經大義先儒所疑有音訓不明者兼採衆家皆為解釋傍引證據各有條疏上聞之詔義玄討論五經正義與諸博士等詳定是非事竟不就後為蒲州刺史卒

顏遊秦師古叔父也為鄆州刺史卒官撰漢官決疑十二卷為學者所稱後師古注漢書亦多取其義

顏師古為祕書少監太子承乾在東宮命師古注漢書承乾表上之太宗令編之祕閣

許叔牙為太子洗馬兼崇賢館學士嘗撰毛詩纂義十卷以進太子賜帛二百段兼令寫本付司經局其後御史大夫高智周謂人曰凡欲言詩者必須先讀此書始可也

格輔元兄希玄高宗時官至雒州司法叅軍章懷太子賢召令與洗馬劉訥言等注范曄後漢書行於世

張太安高宗時為太子左庶子太子賢令太安與洗馬劉訥言雒州司戶叅軍格希玄等注范曄後漢書表上之

賜物三萬段仍以其書付秘閣

王勃高宗時為虢州叅軍撰周易發五卷次論十卷

王元感則天長安中為四門博士表上其所撰尚書糾繆
十卷春秋振滯二十卷禮記繩愆三十卷并所注孝經
史記漢書草請官紙筆給寫秘閣制令弘文館崇賢兩
館學士及成均博士詳其可否弘文館學士祝欽明崇
賢館學士李憲趙元亨成均博士郭山惲皆守先儒章
句深譏元感倚撫舊義元感隨方應答竟不之屈唯鳳

閣舍人魏知古司封郎中徐堅左史劉知幾右史張思敬雅好異聞每為元感申理其義由是擢拜太子司議郎加朝散大夫崇賢館學士

韋顛為吏部侍郎著易蘊解推演潛元終始之義甚有奧旨

高定為京兆叅軍幼聰警絕倫尤精王氏易嘗為易圖合八出以畫八卦上圓下方合則重轉則演七轉而六十四卦六甲八節備焉著易外傳二十二卷

裴延齡為汜水尉乾元末過東都為賊所據因寓居於鄂州綴緝裴駟所注史記之闕遺自號小裴

韋公肅為祕書著作郎公肅注太宗文皇帝帝範十二篇上獻有詔付集賢仍令別寫一本進內

崔玄暉為中書令撰行已要範十卷友義傳十卷義士傳十三卷訓注文館詞林策二十卷

李善寓居汴鄭間講文選為業所注文選十卷行於世後為崇賢館學士

韓滉為左僕射平章事好易象及春秋著春秋通例及
天文事序議各一卷

張守節少集詩禮尤精史義注正義四十卷

張鎰撰三禮圖十二卷五經微旨十四卷孟子音義三
卷

李吉甫為相嘗討論易象異義附於僧一行集注之下
陸贄為給事中皇太子侍讀著集書春秋二十卷類禮
二十卷君臣圖翼三十五卷竝行於代

馮伉元和初為國子祭酒著三傳異同三卷

裴通為詹事著易玄解并總論二十卷易禦寇十三卷
易洗心二十卷

韋表微為翰林學士戶部侍郎少時尅苦自立著九經
師授譜一卷春秋三傳總例二十卷

李磻為相曾注解書傳之闕疑僅及百卷經巢讓之亂
悉為灰燼焉

冊府元龜卷六百六

欽定四庫全書

冊府元龜卷六百七

宋 王欽若等 撰

學校部

誤集

太史公曰儒者六藝經傳以千萬數累世不能通其學
當年不能究其理誠哉是言也由漢之後作者間出祖
述不已踵武增華其文史之盛豈可遽數焉乃有博古
之士好學不倦据撫方策分別羣類列其部居成乎倫

要俾肄業之儒開卷而獲益臨文之士沿波而達源至有承詔撰述篇籍咸叙備於萬乘之覽藏之秘室之府者又多乎哉原夫論次之意蓋將以撮樞要而遵簡易豈易所謂學以聚之傳所謂知類通達者與

楚鐸椒為威王傅為王不能盡觀春秋采取成敗本四十餘章為鐸氏微

漢劉向成帝時為光祿大夫是時帝元舅陽平侯王鳳為大將軍秉政倚太后專國權兄弟七人皆封為列侯

時數有灾異向以為外戚貴盛鳳兄弟用事之咎而上

方精於詩書觀古文詔向領校中五經秘書

言中者以別於外

向見尚書洪範箕子為武王陳五行陰陽休咎之應

休美

也向乃集合上古以來歷春秋六國至秦漢符瑞災異

之記推迹行事連傳禍福著其占驗比類相從各有條

目凡十一篇號曰洪範五行傳論奏之天子心知向忠

精故為鳳兄弟起此論也然終不能奪王氏之權向又

睹俗彌奢淫而趙衛之屬起微賤踰禮制

趙皇后昭儀衛婕妤也

向以為王教由內及外自近者始故採取詩書所載賢

妃貞婦興國顯家可法則及孽嬖亂亡者

孽庶也
變也

序次

為列女傳凡八篇以戒天子及采傳記行事著新序說
苑凡五十篇奏之數上疏言得失陳法戒書數十上以
助觀覽補遺闕帝雖不能盡用然內嘉其言常嗟歎之
後漢應奉為司隸時竝下諸官府郡國各上前人像贊
子幼乃連綴其名錄為狀人紀

景鸞廣漢梓潼人也取河洛圖緯以類相從名為交集

又撰禮內外記號曰禮略又抄風角雜書列其占驗作興道一篇州郡辟命不就

荀爽集漢事成敗可以為鑒戒者謂之漢語位至司空魏文帝使諸儒撰集經傳隨類相從凡千餘篇號曰皇覽

王象為散騎常侍受詔撰皇覽使象領秘書監象從延康元年始撰集數歲成藏於秘府合四十餘部有數千篇通合八百餘萬字

又云桓範為羽林左監劉劭為散騎侍郎並受詔集五經羣書以類

相從作
皇覽

高堂隆撰魏臺雜訪議三卷位至光祿勳

吳張溫為太子傅撰三史略二十九卷

晉張華為司空著博物志十篇行於世

葛洪抄五經史漢百家之言方伎雜事三百一十卷金匱藥方一百卷肘後要急方四卷後為白漏令

環濟撰帝王要畧十二卷

祁嘉博通經籍張重華徵為儒林祭酒性和裕教訓不

倦依孝經作二九神經

應詹撰東宮舊事三卷位至平南將軍江州刺史

宋范泰撰古今善言二十四篇位至侍中左光祿大夫
顧長康為散騎常侍何翌為長水校尉元徽初表上所
撰諫林上自虞舜下及晉武凡十二卷

謝莊轉隋王誕後軍諮議竝領記室分左氏經傳隨國
立篇製本方丈圖山川土地各有分理離之則州別郡
殊合之則寓內為一

何承天為御史大夫宋世禮論有八百卷承天刪減并合以類相從凡為三百卷

南齊丘靈鞠為大中大夫製江左文章錄序起太興訖元熙樓幼瑜著禮据遺三十卷幼瑜教授不應徵辟

陰顥撰瓊林二十卷

崔慰祖嘗著海岱志起太公迄西晉人物為四十卷半未成臨卒與從弟緯書云海岱志良未周悉可寫數本付護軍諸從人一通及友人任昉徐寅劉洋仕至始安

王記室

梁庾詵撰晉朝雜事五卷總抄八十卷普通中詔以為黃門侍郎稱疾不起

阮孝緒撰高隱傳上自炎黃終於天監之末斟酌分為三品凡十卷中篇所載一百三十七人劉歊劉訐覽其書曰昔嵇康所贊缺一自擬今四十之數將待吾等成耶對曰所謂荀君雖少後事當付鍾君若素車白馬之日輒獲麟於二子歊訐果卒乃益二傳傳及孝緒亡訐

兄潔錄其所遺行次篇末成絕筆之意云孝緒天監十
二年徵不至

張率為司徒掾直文德待詔省勅使抄一部書又撰婦
人事二十餘條勒成百卷使工書人瑯琊王深吳郡范
懷約褚洵等繕寫以給後宮

張緬性愛墳籍聚書至萬餘卷抄後漢晉書眾家異同
為後漢紀四十卷晉抄三十卷又抄江左集未及成
卒位至御史中丞

陸罩為中大夫初簡文在雍州撰法寶聯璧罩與羣賢
竝抄撮區分者數歲六年而書成命湘東王為序其作
者有侍中國子祭酒南蘭陵蕭子顯等三十人以比王
象劉劭之皇覽焉

徐勉撰左丞彈事五卷在選曹撰選品五卷又以孔釋二
教殊途同歸撰會林五十卷皆行於世位至右光祿大
夫侍中衛將軍

吳均為奉朝請勅撰通史起三皇訖齊代均草本紀二

十卷

庾仲容抄諸子書三十卷烈女傳三卷位至黟縣令

陳陰僧仁為征南諮議撰梁撮要三十卷

姚察著說林十卷位至吏部尚書

顧野王撰通史要略一百卷位至黃門侍郎光祿卿

張譏為國子博士兼東宮學士撰遊玄桂林二十四卷

後主嘗勅入就其家寫入祕閣

後魏道武天興四年十二月集博士儒生比衆經文字

義類相從凡四萬餘字號曰衆文經

淮王昌弟孚為尚書丞靈太后臨朝宦者干政孚乃總括古今名妃賢后凡為四卷奏之

常山王暉為尚書左僕射暉雅好文學招集儒士崔鴻等撰錄百家要事以類相從名為科錄凡二百七十卷上起伏義迄於晉宋凡十四代暉表上之

王繼叔耽勤讀誦研綜經籍鈎深致遠多所博聞自周以降暨於魏世帝王傳代之由貴臣升降之緒皆撰錄

品第畧畧是非號曰略注合百餘篇好事者覽之咸以
為善焉

劉懋撰諸器物造作之始十五卷名曰物祖位至太尉
司馬

張彛為光祿大夫集庖犧至晉末凡十六代百二十八
帝厯三千二百七十年雜事五百八十九合成五卷名
曰厯帝圖

崔浩為祭酒朝廷禮儀文策詔軍國書記盡關於浩浩

能為雅說不長屬文而留心於制度科律及經術之言
作家祭法次序五宗蒸嘗之禮豐儉之節義理可觀

李謚涿郡人年十八詣太學受業後鳩集諸經廣校同
異比三傳事例名春秋叢林十有二卷徵拜著作佐郎
辭以授弟郁

孫僧化識星分按天占以言災異為通直散騎常侍永
熙中出帝召僧化與中散大夫孫安都共撰兵法未就
而帝入關遂罷

李公繪潛居自持雅好著書撰古今異說記二十八卷
趙語三卷

北齊祖珽拜為尚書左僕射監修國史以後主屬文奏
撰御覽武平三年二月詔珽及特進魏收等入文林館
撰玄洲苑御覽後改名聖壽堂御覽八月御覽成勅付
史閣後改為修文殿御覽凡三百六十卷初詔珽與收
太子太師徐之才中書令崔劼散騎常侍張雕中書監
陽休之監撰珽等奏追通直散騎侍郎韋道孫陸又太

子舍人王邵衛尉丞李孝基殿中侍御史魏澹中散大夫劉仲威袁奭國子博士朱才奉車都尉陸道閑考功郎中崔子振左外兵郎薛道衡并省主客郎中盧思道司空東閣祭酒崔德太學博士諸葛漢奉朝請鄭公超殿中侍御史鄭子信等入館撰書并勅蕭放蕭愨顏之推等同入撰例復令散騎常侍封孝琰前樂陵太守鄭元禮衛尉少卿杜臺卿通直散騎常侍王訓前兗州長史羊肅通直散騎侍郎馬元熙省三公郎中劉珉開府行叅

軍李師上溫君悠入館亦令撰書後命特進崔李舒前
仁州刺史劉逖散騎常侍李孝貞中書侍郎李德林續
入待詔尋又詔諸人各舉所知又有前濟州長史李蒼
前廣武太守魏審前西兗州司馬蕭溉前幽州長史陸
仁惠鄭州司馬江旰前通直散騎侍郎辛德源陸開明
通直郎封孝審太尉掾張德冲并省右民高恭行司徒
戶曹叅軍古道子前司空功曹叅軍劉顓獲嘉令崔德
儒給事中李元楷晉州治中陽師孝太尉中兵叅軍盧

公順司空中兵叅軍周子深開府行叅軍王友伯崔君洽魏師審竝入館待詔又勅右僕射段孝言亦入御覽成後所撰錄人亦有不得待詔付司處分者凡此諸人亦有文學庸淺附會親識妄相推薦者十三四焉雖然當時操筆之徒搜求畧盡其外如廣平宋孝王信都劉善經輩三數人論其才性入館諸賢亦十三四不逮之也待詔文林亦是一時盛事故存錄其姓名

荀士遜為中書侍郎號為稱職與李若等撰曲言行於世

隋陸爽字開明高祖受禪轉太子內直監尋遷太子洗馬與左庶子宇文愷等撰東宮典記七十卷

杜臺卿開皇初被徵入朝臺卿嘗採月令觸類而廣之為書名玉燭寶典十二卷奏之賜絹二百疋位至著作郎

樂運南陽滎陽人嘗願為一諫臣從容諷議而性訐直為人所排抵遂不被任用乃發憤錄夏殷以來諫諍事集而部之凡六百三十九條合四十一卷名曰諫苑奏

上之文帝覽而嘉焉位至毛州高唐令

魏澹字彥深為太子舍人廢太子勇深禮遇之屢加優錫令撰笑苑詞林集世稱其博物

劉祐奉詔撰兵書十卷名曰金韜上善之

崔贖撰洽聞志七卷八代四科志三十卷位至越王長史

于仲文為光祿大夫撰畧覽三十卷

唐歐陽詢為給事中武德七年奉詔與裴矩陳叔達趙

弘智令狐德棻文學袁郎等十數人同修藝文類聚

李百藥初仕隋為禮部員外郎皇太子勇召為東宮學士令修五禮定律令撰陰陽書

魏徵為祕書監貞觀五年撰羣書政要奏之今採其序例以明述作之意曰竊維載籍之興其來尚矣左史右史記事記言皆所以昭德塞違勸善懲惡故作而可紀薰風揚乎百代動而可法明戒垂乎千祀是以歷觀前聖撫運膺期莫不懍乎馭朽自彊不息乾乾夕惕義在

茲乎近古皇王時有撰述竝皆包括天地牢籠羣有競
採浮豔之詞爭馳迂誕之說騁末學之傳聞師雕蟲之
小伎流宕忘返殊途同致雖辯周萬物愈失司契之源
術總百端彌乖得一之旨皇上以天縱之多才運生知
之睿思性與道合動妙機神玄德潛通化前王之所未
化損已利物行列聖所不能行瀚海龍庭之野竝為郡
國扶桑若木之域咸襲纓冕天地成平外內禔福猶且
為而不恃雖休勿休俯協堯舜式遵稽古不察貌乎止

水將取鑿乎哲人以為六籍紛綸百家踳駁窮理盡性
則勞而少功周覽汎觀則博而寡要故爰命臣等採摭
羣書剪截浮放光昭訓典聖思所存務乎政術綴敘大
畧咸發神衷雅致鈎深規摹宏遠網羅政體事非一日
若乃欽明之后屈己以救時無道之君樂身以亡國或
臨難知懼在危而獲安或得志而驕居成以致敗者莫
不備其得失或立功樹惠貞心直道忘軀殉國身殞百
年之中聲馳千載之後或大奸巨猾轉日迴天社鼠城

狐反白作黑忠良由其放逐邦國因以危亡者咸亦述
其終始以顯為臣不易其立德立言作訓垂範為綱為
紀經天緯地金聲玉振騰實飛英雅論徽猷嘉言美事
可以弘獎名教崇太平之基者固亦片善不遺將以丕
顯皇極至於母儀嬪則懿后良妃恭徽猷於十亂著深
誠於辭輦或傾城哲婦亡國豔妻候晨難以先鳴待舉
烽而後笑者時有所存以備勸戒自六經訖於諸子始
五帝下盡晉年凡為五秩合五十卷本求政要故以政

要為名但皇覽遍畧隨方類聚名目互顯首尾淆亂文
義斷絕尋究為難今之所撰異乎先作總立新名各全
舊體欲見本知末原始要終竝棄彼春華採茲秋實一
書之內牙角無遺一事之中羽毛咸盡用之當今足以
殷鑒前古傳之來葉可以貽厥孫謀引而伸之觸類而
長蓋亦言之者無罪聞之者足以自戒庶弘茲九德簡
而易從觀彼百王不疾而速崇巍巍之盛業開蕩蕩之
王道可久可大之功竝天地之貞觀日用日新之德將

金鏡以長懸矣太宗覽之稱善勅皇太子諸王各傳一本賜徵帛二百疋又徵為特進以禮經遭秦滅學戴聖編錄條疏不次乃刪其所記以類相從為五十篇合二十卷名類禮太宗善之賜物一千段以其書藏秘府及賜皇太子諸王

李襲譽為揚州總管長史撰忠孝圖二十卷貞觀十三年十一月奏之太宗覽而稱善

高士廉為尚書右僕射貞觀十五年撰文思博要一千

二百卷上之有詔藏之秘府

時太學博士馬嘉運
太常丞呂卞同修

高智周為祕書郎弘文直學士預撰瑤山玉彩文館詞

林三遷蘭臺大夫

李敬玄撰正論三卷位至揚州大都府長史

杜正倫為中書侍郎兼左庶子撰春坊要錄四卷

許敬宗為弘文館學士永徽中與李義府等奉勅於內
殿撰東殿新書二百卷高宗自製序其書自史記至晉
書刪其繁詞勒成藏之書府

元萬頃上元中為著作郎則天廣召文詞之士入禁中
修撰萬頃與左史劉禕之范履冰苗神客右史周思茂
胡楚賓等咸預其選前後撰列女傳臣軌百寮新誠樂
書凡千餘卷

姚璿永徽中為太子宮門郎博涉經史有才辯與司議
郎孟利貞等奉令修瑤山玉彩書成遷祕書郎

張昌宗為麟臺監聖曆中則天以御覽及文思博要等
書多未周備令昌宗與麟臺少監李嶠廣召文學之士

給事中徐彥伯水部郎中員半千等二十六人增損文
思博要勒成一千三百卷於舊書外更加佛教道教及親
屬姓氏方域等部至是畢功帝親製名曰三教珠英時
左補闕崔湜同修

韋叔夏神龍中為國子祭酒撰三禮要記三十卷行於
代

王方慶撰宮卿故事一卷位至太子左庶子

徐堅為集賢院學士開元中勅堅等纂經史要事及歷

代文章以類相從欲令皇子簡事綴文帝自定名為初學記是日撰成以獻帝稱善賜堅等絹三百疋

張九齡為中書令開元二十七年二月九齡等撰六典三十卷成上之

歸崇敬為國子司業大厯中與諸儒官同修通志崇敬知禮儀志衆稱允

裴澄為國子司業貞元十二年表上乘輿月令十二卷蘇冕為京兆府士曹續國朝政事撰會要四十卷

杜祐為淮南節度使貞元十七年獻通典表曰臣聞太上立德不可庶幾其次立功道行當代其次立言見志後學由是往哲述相祖述將施有政用又邦家臣本以門資幼登官序仕非遊藝才不及人徒懷自彊頗翫墳籍雖履歷叨幸或職劇務繁竊惜光陰未嘗輟廢夫孝經尚書毛詩周易三傳皆父子君臣之要道十倫五教之宏綱如日月之下臨天地之大德百王是式終古攸遵然率多記言罕存法制愚管窺蠡測豈達高深輒肆

荒唐誠為臆度每念惜學莫探政經畧觀歷代衆賢著
論多陳紊失之弊或闕拯救之方臣既庸淺寧詳損益
未原其始莫暢其終尚賴周氏典禮秦皇蕩滅不盡縱
有繁雜且用準繩至於往昔是非可為來今龜鑑布在
方策亦麤研尋自頃纂修年涉三紀識寡思拙心昧
詞蕪圖籍實多事目非少將謂功畢有愧乖疎固不足
發揮大猷但微臣竭愚盡慮凡二百卷不敢不具獻上
庶明鄙志所之塵瀆聖聰兢惶無措其書凡九門叙食

貨十二卷選舉六卷職官二十二卷禮一百卷樂七卷
兵六卷刑十七卷州郡十四卷邊防十六卷

賀蘭正元貞元中為昭義軍節度使判官進用人權衡
輔佐記各十卷舉選衡鏡三卷

馬總為天平軍節度使總理道素優軍政多暇公務之
餘手不釋卷所著奏議集年歷通歷子鈔等書百餘卷
行於世

唐次為禮部員外郎貞元八年坐竇叅出為開州刺史

在巴峽間十餘年不獲進用西川節度使韋臯抗表請
為副使德宗密諭臯令罷之次久滯蠻荒孤心抑鬱怨
謗所積孰與申明乃採自古忠臣賢士遭罹讒謗放逐
遂至殺身而君猶不悟其書三篇謂之辯謗畧上之德
宗省之猶怒謂左右曰唐次乃方吾為古之昏主何自
諭如此改夔州刺史及憲宗即位與李吉甫同自峽內
召還授次禮部郎中尋以本官知制誥正拜中書舍人
卒憲宗明哲嫉惡尤惡人朋比傾陷嘗閱書禁中得次

所上書三篇賢而善之謂學士沈傳師曰唐次所集辯
謗之書實君人者時宜觀覽朕思古書中多有此事次
編錄未盡卿家傳史學可與學士類例廣之傳師與令
狐楚杜元穎等分功修續廣為十卷號元和辯謗略優
詔答之

憲宗元和八年六月詔宰臣武元衡李吉甫李絳及舊
相太子少傅判太常卿鄭餘慶禮部尚書權德輿各進
舊書

張正甫為集賢殿學士右散騎常侍寶曆二年進藝文類聚一百卷

令狐楚為翰林學士憲宗以自古賢臣多受讒謗以至危亡因詔楚纂集歷代名臣受謗者為十卷名為元和辯謗畧書成帝嘉其該博

李渤為著作佐郎罷官閒居東雒撰禦戎新錄二十卷以獻

韋處厚穆宗時與路隨為翰林侍讀學士長慶二年處

厚與隨撰六經法言二十卷書成表獻之曰臣聞三皇
講道五帝講德三王講仁五霸講義所講不同同歸於
理理道之極備於六經雖質文相變忠敬交用損益因
時步驟不一然而釋三綱越五常而致雍熙者未之有
也自秦火蕩蕪孔壁穿蠹曲學異辯專門多惑營道之
軌竝馳希聖之堂蓋寡蕪文錯起浮義互生簡冊混散
篇卷繁積勞神於累代故形於當年其知愈博其得愈
少夫然通方之士達識之儒且猶不為也况南面之尊

司道之契豈不貪其精而遺其靡者乎伏惟文武孝德
皇帝陛下精義神授博識天資山峻詞峯泉蓄學海膺
休運則混六合而不讓思屈已則舞兩階而不疑故當
希皇踵帝肩王轡霸可以區區近躅擬於聖德哉臣處
厚臣隨採合易詩書左氏春秋孝經等因其本篇撮其
精粹論紀先師微旨今亦附於篇末總題曰六經法言
合二十卷獻上取諸身必本於五事下通諸物兼暢於三
才始九族以及於百姓刑室家以儀於天下聖君良主

之往行哲人壯士之前言天人相與之際幽明交感之
應窮理盡性之辯藥石攻磨之規堯舜禹湯文武理亂
之道盡在君臣父子夫婦朋友之義必舉其興可以觀
勸其違可以戒此其所存者也至如爻象錯綜陰陽難
名比興箴誨幽隱難釋誥命訓論古今不合威儀類制
命諸有司褒貶揚榘歸諸史法此其所遺者也商鞅之
說秦主歎帝道之難行太宗之納魏徵流王澤而廣被
繇是言之道無遠近德無重輕能者挈之如毛羽不能

者舉之如嵩岱今逢希代之君當難合之運故不能以
百家邪說六國縱橫秦漢刑名魏晉偷薄為盛時道歷
代帝王皆務纂集魏稱皇覽梁著遍畧鄴中則有修文
之作江左則有壽光之書但誇銜於聞見非垂謀於理
本臣今所貴實異斯作陸賈奏甚卑之論尚稱善於高
皇方朔獻雜糅之說猶見知於武帝伏惟陛下機務之
餘燕息之暇時降省覽天下幸甚帝覽其書稱善者久
之賜處厚隨錦綵二百疋銀器二事

崔郾為翰林侍講學士寶曆元年七月與高重進纂要集十卷各賜綵錦二百疋銀器五事

魏謩嘗鈔撮子書要言以類相從二十卷號曰魏氏手畧有文集十卷位至太子少保

裴潏文宗時為右散騎常侍太和八年集歷代文章自梁昭明太子著文選外合於典雅者古今通選勒成三十卷目為太和通選并意義目錄一卷進上潏之所著偏僻時論以為不當

王涯同平章事太和八年進月令圖一軸

兵部尚書王起進自古帝王五位圖帝欲置於几案以便觀覽宣付起重以長卷寫進

許康佐為翰林學士太和九年進纂集左氏傳三十卷
高重為國子祭酒太和九年進春和纂集四十卷

鄭澣為翰林侍講學士文宗命撰經史要錄十二卷書
成帝嘉其精博因以十九書語類帝親自發問澣應對
無滯錫以金紫

姚康為太子詹事大中五年十一月以所撰統史三百卷上之統史自開闢至隋末編年纂帝王美政善事詔令可利於時者至於時政鹽鐵筦榷和糴賑貸錢陌兵數虛實貯糧用兵利害邊事戎狄無不備載下至釋道燒煉妄求無驗皆載之

崔鉉為左僕射平章事大順七年十月鉉上續會要四十卷修撰官楊紹復崔瑑薛逢鄭言等賜物有差

梁末帝貞明末前衡州長史劉騭進所撰地里手鏡十

卷

晉曹國珍為左諫議大夫天福四年上言請於內外臣
寮之中選才略之士聚唐六典前後會要禮閣新儀大
中統類律令格式等精詳纂集俾無漏畧別為書一部
目為大晉政統從之其詳議官宜差太子少師梁文矩
散騎常侍張允大理卿張澄國子祭酒唐洎大理少卿
高鴻漸國子司業田敏禮部郎中呂咸休司勳員外
郎劉濤刑部員外郎李知損監察御史郭延升等一十

人允文矩等咸曰改前代禮樂刑憲為大晉政統則堯
典舜典當以晉典革名列狀駁之曰作者之謂聖述者
之謂明苟非聖明焉能述作若運因革故則事乃維新
或改正朔而變犧牲或易服色而殊徽號是以五帝殊
時不相沿樂三王異世不相襲禮至於近代率由舊章
比及前朝是滋其目多因行事之失改為立制之初或
臣奏條章君行可否皆表其年月紀以姓名聚類分門
成文作則莫不悉稽前典垂範後昆述言聖賢歷於朝

代得金科玉條之號設亂言破律之防守而行之其來尚矣皇帝陛下運齊七政厯契千年爰從創業開基莫不積功累德行宜直筆具載鴻猷若備錄前代之編年目作聖朝之政統此則是名不正也夫名不正則言不順而媚時掠美非其實矣若剪截其詞此則是文不備也夫文不備則啓爭端而禮樂刑政於斯亂矣若改舊條而為新制則未審何門可以刊削何事可以編聯既當革故從新又須廢彼行此則未知國朝能守而不失

乎臣等同共叅詳未見其可疏奏嘉之其事遂寢

張昭為兵部尚書世宗親征淮南表進所撰兵法其畧曰臣本書生不嫻武藝空忝穰苴之位慙無郟穀之能遽捧綸言令纂兵法雖疆三宮之說何稱九天之謀伏惟陛下玉斗纘戎金樓聚學九舜十堯之典不足揣摩三門五將之書無煩接要而猶申旦不寐乙夜縱觀留連於尺籍伍符探賾於楓天棗地以為人情貴耳而賤目儒者是古而非今以韓白之智有餘英衛之才不足

寧悟渭水釣翁之學今迺椎輪圮橋神叟之言已為糟粕無足師模於鈐筭聊可挹酌於源流爰命下臣撮其樞要臣逖觀前代兵家所著篇部頗多自唐末亂離圖書流落今蘭臺祕府目錄空存其於討論固難詳悉今祇據臣家所有之書撫其兵要自軍旅制置選練教習安營結陣命將出師詭譎機權形勢利害賞罰告誓攻守巧拙星氣風角陰陽課式等部四十二門離為十卷管窺蠡測莫知穹渤之高深獸走犬馳且副菟苗之指

使既成卷部須有籤題臣伏見前代奉詔撰論皆目為制旨今輒準故事題為制旨兵法臣留司都下不敢輒去班行謹差私吏齎詣行闕陳進詔曰朕昔覽兵書麤知前事將觀機要委卿撰述曾未踰時遠來呈進披尋之際備見精詳論戰法之大綱與孫吳而共貫賴卿博學副朕所懷宜示頒宣用明恩寵嘉獎在念再三不忘今賜卿衣着二百疋銀器一百兩

冊府元龜卷六百七